

Seitin bin Temtimbat Jisas

(Methyu 4:1-11)

Storimen: Brom deya det Holi Spirit bin deigim Jisas langa bush blanga larram det boswan dibuldibul temtimbat im.*

² Wal Jisas bin jidanbat deya 40 dei en 40 nait, en im nomo bin dagadagat (idimbat) eni daga. ³ Afta imbin brabli hanggri, en det boswan dibuldibul bin kamat langa im, en imbin stat temtimbat im na. Imbin stat toktok olkainwei langa Jisas,

Boswan dibuldibul: “Yu reken yu san blanga God. Wal yu dalim dijan ston blanga meigim miselp daga blanga yu.”

Jisas: “Nomo. Ai kaan duwit, dumaji im tok langa oltestaman, ‘Yu kaan jidan laibala jis brom dagadagat daga. Yu garra bulurum det wed blanga God.’”*

Storimen: Brom deya det dibuldibul bin deigim Jisas langa det seikridwan taun gulum Jerusalem, en imbin meigim im jidan ontop langa det brabli haiwan haus deya langa det Serramoni Pleis blanga ola Juwish pipul, ⁶ en imbin tok,

Boswan dibuldibul: “If trubala yu blanga God san, wal yu tjakamdan miselp brom dijan haiwan haus, dumaji im tok langa oltestaman, ‘God garra dalim ola einjul blanga im blanga lukaftumbat yu.’ En im tok langa oltestaman, ‘Detlot einjul garra holdim yu ontop garram olabat bingga weya yu kaan ardim miselp.’”*

Jisas: “Nomo. Ai kaan duwit, dumaji im tok langa oltestaman, ‘Yu kaan meigim God duwit blanga yu blanga testimbat im.’”*

Storimen: Brom deya det dibuldibul bin deigim Jisas ontop langa brabli haibala hil, en imbin shoum im ola kantri langa dijan wel garram ola gudbala enijing, en afta imbin dalim Jisas, ⁹

Boswan dibuldibul: “Ol dislot enijing iya weya yu luk, wal ai garra gibit yu if yu buldan en weship langa mi.”

Jisas: “Yu gowei brom mi, Seitin. Ai kaan dum wanim yu wandim, dumaji im tok langa oltestaman, ‘Yu garra weship langa God, dumaji oni im na bos, en yu garra wek blanga im.’”*

Storimen: Brom deya det dibuldibul bin gowei brom Jisas, en ola einjul bin kaman langa Jisas, en deibin album im.